



... une conte al mès?

Sì, sì, lu savìn. La nestre Ostarie e regale contis ogni setemane, ma us vin anticipât **tal nestri post galatic** che **o vin voie di dâsi da fâ, chest an**, e o pensin che al sedi ben fâ ancje cualchi operazion di marcjât par tirâ dongje letôrs. Sì, o vin dite propite letôrs, che se no fossin chei, al è clâr, no coventressin nancje i contecurtârs! E no o sin une Ostarie che come prodot di fonde e à propite la conte curte e nus fâs plasê soledut che si vegni a lei contis curtis in lenghe furlane. Par chel i tignîn ai nestris clients e o vin voie di premiâju.

Si che duncje, ce vino pensât?

Une idee che e je vignude al Ostîr e a la Sartore dentri des cjaris che si fasin par mandâ indevant la barache. Pensant **a la conte di Nadâl** che e jere plui lungje dal solit e che si podeve lei par intîr dome su la Patrie dal Friûl, si sin dits: **Ma parcè no regalâle a chei che a ricevin i inzornaments de ostarie vie mail?** E di li la robe nus à cjàpât la man e o sin rivâts adiriture a tornâ a meti a puest dut il sisteme comunicatîf de ostarie vie mail. Po dopo l'Ostîr al à clamât la Coghe, si è fat dâ i miôr ingredients e al à tacât a... scrivi une altre conte!

Parcèèè? Ma al è clâr! O vin voie di regalâ simpri robe gnove!

**A man drete o cjatais il spazi dulà podê inserî il vuestri non e la vuestre direzion di pueste eletroniche e par podê ricevi un messaç ogni setemane che us vise dai inzornaments la ostarie.** Par cui che nus lei sul telefonut, baste scori un pôc plui sot di chest articul, là che al è scrit **Corinus daûr vie email.**

E voaltris o disarês: *Eh, ma tant jo o torzeoni simpri par internet e lu lei alì...*

Benon! Ma vûstu meti ce comoditât che ti rivi za dut te cassele de pueste?

E no je finide chi, la robe. A ducj chei che a saràn iscrits ae nestre liste, ven a stâi clients afezionâts, **l'Ostîr ur mandarà une conte di rive jù che no sarà publicade sul sît e che sarà inviade dome a chei di liste.** Une conte che e cirarà di jessi moderne, ma furlane, e cjàpâ dentri ancje i ingredients che la nestre Coghe e à metût dongje par che l'Ostîr la prepari, contant di cualchi event o tradizion di chël mês. E dut chest metût dongje intun comût pdf che us vignarà mandât personalmentri dal ostîr.

**La conte dal mês di Zenâr e je proviodude par il 16,** (doman di sere!) date che e je il complean de nestre ostarie e che o cjatìn perfete par fâus chest prin regâl. Ostîr, Coghe e Sartore a stan lavorant come dai mus par prontâ dut par doman di sere (sì, lu savìn che l'ostîr al è mus ancje se nol lavore).

A voaltris, **par podê vê la Conte dal Mês a partî de prime, no us reste che inserî la vuestre direzion di pueste e dopo confermâ il messaç che us rivarà te pueste eletroniche!**



**Svelts!**